

# Tambu y canticanan di Tambu: patrimonio di Aruba



**ORANJESTAD** - Musica di tambu ta un di e prome musica di Aruba. Por bisa cu tambu tin mas cu 200 aña aki nan. Mas o menos rond di aña 1750 a introduci catibonan Africano na Aruba.

E indjannan Caquetio cu tawata biba aki riba por a bati entre otro: riba palo, nan por a supla den cocolishi, pero nan no por a bati cu nan man riba un obheto y produci zonido. E indjannan no por a traha instrument membranofono. Bou di e ultimo categoria aki, tambu ta cay.

A toca tambu riba Aruba henter y Brazil a conserva canticanan, cu tin mas di 150 aña.

E cantado mas antiguo di tambu y Dande di tambu ta Wimpi Maduro cu a nace na 1836 y a muri na 1903. Wimpi Maduro tawata cantado di tambu y cantado di hende.

Apesar cu den Caribe y costanan di Colombia y Venezuela a toca tambu, sinembargo tur e pueblonan tin diferente tecnica pa hol e troncon

di palisia, soya e cuero y curti e cuero di cabrito. E tecnica pa rek e cuero riba e troncon di palisia, tambe ta varia di isla pa isla. E diferencia grandi ta sinta den e forma cu cada tabulero ta uza su man pa saca diferente zonido. Tur e caracteristicanan aki, ta diferencia cultura di cada isla.

Aruba tin 4 diferente sla esta: Cantica di biento, Punda, Siya y e ritmo di Dande cu ta e ritmo exclusivamente p'e Dande. Antes, sigur den tempo di Wimpi Maduro, e hendenan no por a ni skirbi ni lesa. Hunto nan ta compone y hunto nan traha e wijs.

E culminacion di tambu ta aña nobo, cu e repertorio di Dande di Tambu. Aña nobo ta saluda henter e famia cu Dande di tambu, y despues, cu e cantica di biento 'Prome di Janito' ta canta e pareha, doño di cas y pa dispidi, ta gradici e pareha pa a ricibi e Dande cu e Siya 'Bon anochi'.

Tur e canticanan aki y mas, ta riba e prome CD, cu yama

'TAMBU Y CANTICANAN DI TAMBU: PATRIMONIO DI ARUBA. Tur e canticanan aki, incluyendo e Dande di Tambu, ta di compositor desconoci. Den e proyecto aki, ta trata di conserva e canticanan di tambu, den e forma mas original cu por. E CD ta dedica na memoria di tur tambulero, cantado y La Mariana, baliado y trahado di tambu. Nan ta: Wimpi Maduro (1836-1903); Ma Lana Krozendijk; Ma Djuli Maduro; Goi Krozendijk 1854; Matew Maduro (1862-1948); Buchi Mon Krozendijk (1880-1932); Cola Vries; Dominico Maduro (1904-1970); Pedro Krozendijk (1905-1971); Goi Ras (1906-1991); Lie Krozendijk 1911; Andres Stamper (1911-1992); Maria Krozendijk y Seferino (Foyon) Maduro. Pa mas informacion por comunica cu: Patricia Thiel cel: 5688402, Bert Thiel cel 5947453 y Celia Thiel cel: 5934587. Tambu di Aruba no tin tempo, tur tempo ta su tempo. Unda cu e bay, su reis ta keda. □